



*Serbska zakladna šula Rašbicy*

# Delanski ZWónčk



*Wulki róžk 2025 / číslo 97*

*Sorbische Grundschule Rašbitz*

## Předčitanski dzeń na našej šuli

Zakład za kognitiwne kmanosće a wuwice rěče kładže wšedne předčitanje a čitanje. Tak skići so předšulskim dźěćom a małym čitarjam wot wšeho spočatka wobšěrniji słowoskład, gramatiske prawidła so cyle připódla přiswojeja a zmysł čitaneho so lóšo zapřija. Nimo toho so fantazija spěchuje, koncentracija so polěpši a pomjatk so trenuje. Hižo Astrid Lindgren zwurazni: „To najwažniše je, zo dźěći knihi čitaja, zo móže dźěćo ze swojej knihu same być. Porno tomu su filmy, telewizija a wideja jenož zwjeršne nazhonjenja.“ Předčitanski dzeń 15.11.2024 běše nam tuž dalša witana składnosć, šulerjam wysoku hódnotu čitanja a mjezsobneho připosłuchanja sprosředkować. Z wulkimi wočimi slědowachu naši najmłódši šulerjam 4. lětnika, kotřiž při přijomnej atmosferje bajku, žorty a hódančka předstajichu. Cyle spontanje wzachu sej tež šulerjo 1. lětnika znate teksty a je z wjeselom a hordosću předčitachu. To přiwzachu šulerjo 4. lětnika runje tak z připóznaćom a małym posměwkom. Wulki aplaws na kóncu słušeše wšitkim čitarjam tutoho dnja.

S. Domšowa





## Dohodowny koncert

Na dnju swjateho Mikławša, 6. decembra 2024, dožiwichu naši starši, dźědojo a wowki a wšitcy zajimcy rjany dohodowny koncert našeje zakładneje šule. Hižo tydženje do koncerta započinachu šulerjo pilnje zwučować: Wuknjechu basnje, nazwučowachu spěwy a probowachu rejki. Wulka bě napjatosć, jako so sportowa hala zaso do pyšnje wuhotowaneje žurle přeměni. Błyščate woči dźěci a wutrobity přiklesk publikuma běchu wšitkim organizatoram najwjetše připóznaće.

F. Rachelina







*Lube šulerki a lubi šulerjo, starši, dźědojo a wowki,  
přistajeni šule, lube čitarki a lubi čitarjo Delanskeho zwónčka,  
za lětuši hodowny čas přejemy Wam strowotu, pokoj, měr,  
nadźiju a spokojnosť.*



*Njeh Was w nowym lěće strowota a Bože žohnowanje přewodźatej.*

*Dźakujemy so wšitkim, kiž su k poradženju našeho lětušeho dohodowneho koncerta přinošowali, zo móžachmy wosebity wokomik dožiwić. Wulki dźak słuša tež wšitkim hosćom za wulkomyslne pjenježne dary a knjezej Frankej Wjeseli za jeho wulkotnu podpěru z techniku. To wolóža nam přihoty na koncert, hosćom skića to pak wulkotny słuch.*

**Termíny:**

31.01.2025

14.02.2025

wopyt ptačokwasneho programa w Chróscicach

wudawanje poślětnych informacijow a šulska póstnička

